

# RTR ha ina buna preschientscha e purschida sin ils chanals da social media

Cussegl dal public SRG.R

■ (rtr) En sia seduta champestra en la claustra benedictina a Mustér ha il Cussegl dal public SRG.R analisà la purschida dad RTR sin facebook ed instagram. En general survegn questa purschida bunas notas. Ils temas sajan actuals e pertutgian differents spartas da la vita. Er la pagina rtr.ch po prender encunter bler laud dal Cussegl dal public. Ella fetschia ina buna parita e saja clera e survesaivla. Main laud datti per in'acziun che RTR ha fatg avant la festa da chant a Chiavenna.

## RTR sin facebook ed instagram

Sin ils chanals da social media po il public s'infurmar mintga di davart las actualitads senza perder bler temp cun tshertgar. Quai plascha al Cussegl dal public. En ses rapport menziuna el er la variaziun tranter infurmaziun e divertiment che saja tshernida bain. Tge che crodia dentant si saja ch'ils posts sin facebook e sin instagram sajan per il pli identics e quai saja donn. Ils ultims onns haja RTR dà grond pais als chanals da social media e quai saja da valitar fitg positiv. Uschia saja RTR er attractiv per persunas pli giuvnas.

## rtr.ch – in svilup fitg positiv

La pagina d'internet rtr.ch saja structurada fitg bain. Ella saja uschia adattada per tut ils apparats (pc, tablet, smartphone). Ils temas sajan ordinads tenor criteris survesaivels – sulettamain en la rubrica «ulteriuras novitads» daventia quai main survesaivel. Interessantas e nizzaivlas sajan er las propostas sut «da-

pli dal tema». Per tshertgar emissiuns u contribuiziuns stoppian ins dar en il chavazzin per rumantsch grischun. Quai fetschia in zic pli cumplitgà il tshertgar, ma na saja tuttina betg in impediment. L'applicaziun «play rtr» haja ina structura clera e survesaivla ed ins chattia fitg svelts las contribuiziuns. Al Cussegl dal public plascha surtut la clera structura, la sauna relaziun tranter text e fotografia, l'alta qualitat dals films e che la pagina d'internet dettia pais a novitads ed occurrenzas regiunals.

## La Canorta – in format cun potenzial

L'idea da laschar vegnir a pled in expert extern vegn beneventada dal Cdp. Cun grond engaschament ha *Guido Derungs* accompagnà tras l'emissiun ed empruvà d'animar audituras ed auditurs dal Radio Rumantsch da raquintar d'experientschas, anecdotes e reminiscenzas fatgas en connex cun festas da chant. Savens è quai gartegià bain, autras giadas main, in'experientscha ch'er las moderaturas ed ils moderaturs professiunals dad RTR fan bain savens cura ch'els vuessan entrar en contact cun il public. Plaschì fitg bain al Cdp ha la schelta da la musica, da las chanzuns da chors, ch'è vegnida fatga per las emissiuns.

En mintga cas animescha il Cdp da cuntinuar cun quest format, quai cun resguardar las experientschas fatgas en connex cun la premiera da La Canorta, uschia per exempel da ponderar sch'ins na vuess betg far la moderaziun en dus, pia laschar accompagnar l'expert extern durant l'emissiun dad in moderatur dad

RTR. In compliment spezial fa il Cdp ad RTR per ulteriuras emissiuns realisadas avant, durant e sunter la Festa da chant chantunala a Chiavenna. Quellas sajan gartegiadas fitg bain.

## In sguard anavant

Ils proxims temas ch'il Cussegl dal public prenda sut la marella èn la plattform online «nossaistorgia.ch» nua che in e scadin po inoltrar fotografias ed istorgias da pli baud, la gasetta «Accents» che cumpara quatter giadas ad onn e l'emissiun naziunala «ils auters» che lascha vegnir a pled correspundents da mintga regiun linguistica en Svizra.

## Infurmaziuns davart il Cussegl dal public SRG.R

Il Cussegl dal public è in gremi consultativ independent ch'accumpogna la lavur ed il svilup dal program da RTR Radiotelevisiun Svizra Rumantscha cun constataziuns e propostas. Il Cussegl dal public sa raduna per regla quatter giadas ad onn. El observa singulas purschidas da program, emissiuns ed offertas online da RTR. Il Cussegl dal public SRG.R procura per in stretg contact tranter ils responsabels dal program ed il public. El sa cumpona da 15 members.